

Ils uffiziers giavischan in rapport cun dapli charn

Rapport da segirezza 2016 en la critica

DA CLAUDIA CADRUVI / ANR

■ **Memia pulit, memia pauc liant e betg duvrabel per instradar mesiras u midadas concretas. Uschia pon ins resumir la critica da la societad d'uffiziers vi dal rapport da segirezza. Il glindesdi tracta il cussegl dals chantuns la fatschenta.** Per il solit na datti betg gronda opposiziun cunter in tal rapport ch'il cussegl federal sutta metta mintga tschintg onns al parlament. Las chombras prendan enconuschientscha e basta. Questa giada daudan ins critica recenta ord las retschas dals uffiziers. Gist els, che na sa maschaidan uschiglio betg en la politica, pretendan ch'il parlament dettia

l'incumbensa dad elavurar in auter rapport cun dapli charn.

L'atun passà ha *Stefan Holenstein*, il president da la societad d'uffiziers, publicità in'analisa en la revista d'uffiziers: I manchian arguments strigents e directivas cleras per sviluppar l'armada. Vi da questa critica na saja sa midà nagut, hai già num ier tar la societad d'uffiziers.

«Correctadad politica»

Empè da mussar si consequenzas concretas unfreschian ins quest rapport a la «correctadad politica», scriva *Holenstein*. El conceda ch'ins ha fatg, cumpareglia cun il rapport dal 2010, in tschert progress, per exempel areguard la deter-

minaziun da la defensiun che na sa basa ozendi betg mo sin la smanatscha d'in auter stadi, mabain era sin smanatschas modernas u hibridas. Il president dals uffiziers conceda era che las constataziuns generalas dal rapport «pon per gronda part esser correctas». Tenor el manca dentant cumplettaimain ina contemplaziun critica da la politica da segirezza svizra d'enfin ussa. Uschia fetschia quai la parita sco sch'i n'existess nagin potenzial d'optimaziun.

En il rapport manchian scenaris che mussian ils pli privlus ed impurtants svilupps pussaivels per la Svizra per lura pudair trair ordlunder las consequenzas per ina politica da segirezza che fa effect. Il

rapport na differenzieschia betg tranter las incumbensas da l'armada ed il servetsch civil. «Tenor noss manegiar n'èn ni il servetsch civil ni la duana instruments da segirezza politica che tutgan en quest rapport», scriva *Holenstein*. Empè fissi pli impurtant dad integrar la guardia da cunfin.

I manca ina strategia

En il chapitel davart la strategia enunteschian ins la cooperaziun, l'autonomia e l'engaschament da la Svizra. «D'ina strategia sco tala na pon ins dentant betg discurre», crititgescha il president dals uffiziers. Ina tala avess da preschentar ina via clera e mesiras concretas cun las qualas ins less cuntanscher las finamiras da segirezza.

Ina da las impurtantas dumondas na saja insumma gnanc menziunada, numadamain la finanziaziun – en vista a las resursas stgarsas – d'ina armada che duess ademplir ina defensiun moderna cun aviatica, defensiun aviatica, panzers, artiglieria e comunicaziun moderna.

Tge pretenda la societad d'uffiziers?

Il parlament duai refusar da prender enconuschientscha dal rapport e dar l'incumbensa dad elavurar in nov rapport strategic. Quel duai mussar ils scenaris tar ils svilupps pli privlus per la Svizra cun la stringenza necessaria pertutgant constataziuns, enconuschientschas e consequenzas. En spezial duai il rapport definir ina strategia co che la politica da segirezza e ses instruments hajan da sa sviluppar en l'avegnir en vista a las smanatschas actualas e las resursas stgarsas tant finanziaias sco personalas.



La critica da la societad d'uffiziers vi dal rapport da segirezza è vegnida recenta. Memia pulit, memia pauc liant e betg duvrabel per instradar mesiras u midadas concretas, uschia tuni en il rapport.